

邃

雅

堂

集

鴻溪遠眺泰伯墟空亭倚山麓酌茗清且腴歸經秦氏
園園徑猶未蕪清池滙空碧巖壑盤溪紆庭軒幽且邃
竹樹森以疎泉響何泠泠琴筑鳴階隅登陟力已憊歸
臥久未蘇童僕供盤餐蔬果雜雞魚對酒不能飲坐惜
良辰徂但聞帆檣上啞啞啼飢鳥

登金山寺塔

浮玉岩龔障巨流得緣象教恣冥搜眼空近海無邊地
身到諸天最上頭江渚潮痕帆正上石城霞片雨初收

蒼茫一氣無今古壯士登臨尙百憂

孟廟

吾道都應歷九州天遺一老又周流見知不在伊皋下
霸業終慙管晏儔功奠洪波排異學象尊喬嶽屈強侯
豐碑古廟風塵裏落日征車更此留

萬古尼山接壤同繚垣喬木撼驚風當時一力肩三聖
難免蒼生困七雄偉略明堂瞻治術遺模并地識農功
時窮未展經綸在報祀春秋典禮崇

汶上縣與秋水別余方赴大名省覲

兼旬常作伴分手忽前程夢警荒雞唱情淒班馬鳴問
人愁閒道期日到神京一榻須留與論文酒共傾

抵大名

三輔稱巖邑危城在望中大名思畢萬重鎮數天雄儉

畚猶民俗強梁亦土風

時方有段文經事

晨昏吾久曠早遣僕

夫通

宜興盧忠肅公爲大名相國成文穆公門下士忠

肅初守大名後復以副使整飭大名等郡兵備
故致相國手札甚多成氏後人藏皮祠內文田
請借觀之書法清勁無匹所言多西山寇盜事
攷明史乃山西賊流入畿輔據臨城之西山崇
禎六年事也憂時撫事忠愛之忱流溢翰墨讀
之泫然欲涕因留玩數日歸之

絕野棲遲軍鮮飽淒涼父老貽升棗草履麻衣體攢鏃
三郡遺民同一哭十年萬死不顧身一朝償敗徒酸辛

皆言閻豎喪明社海內未遂空無人奇才偉略世希有

南廬北孫

傳庭

皆絕倫武陵一出國事去眼見宮闕飛埃

塵賢豪生與時事會天意或教支廢壞卻令宵小更敗
之顛倒終難測茫昧蒿水橋邊戰血流八十日尸猶不
收呼天邏卒鞭且死人理那復幾希留我從史傳攷勲
迹卷不能終憤填膈當時恨無折檻人請殛姦回謝宗
祏流傳翰墨奕世珍書生餘事猶軼羣憂時撫事意慊
慨令我淚墮還沾巾吁嗟天已厭明德倔強孤臣空盡

力請看七日降淫霖一死遺骸求不得

將至京師途中寄弟通甫

兄弟天涯更幾人觸來離緒總酸辛
高堂景逼桑榆近生計心愁菽水貧
雁路驚風難戢翼鵠原秋草劇傷神
微軀賸爾爲同命努力加餐共此辰

楊丈堉不見十年矣辛亥仲春喜晤金閭旅舍率

贈二律

回首蘆花夾去津河梁攜手各沾巾

甯平知十載風塵

際仍是三吳浪迹人元晏著書翻藉病馮謹有劒未全

貧石頭終古沈書處空憶秋江六六鱗

翁僑寓石頭屢荷惠書不至

司戶才名老更親長將樗散惜斯人書成快雪爲家法
畫絕梅花是後身縱酒高歌時獨往雕蟲餘技必殊倫
飄零湖海繁霜鬢乍喜相逢更怡神

苦雨歎

今年夏雨日甲子占者謂當船入市湖自去冬及始春
雪飛袤丈周千里累月濛濛雨不休茅檐暫見陽和耳

吾鄉歲入彊半蠶葉溼天寒蠶盡死私逋官賦兩煎迫
況乃田疇廢耰耔惡霧頑雲慘不開高原下隰平如砥
往時五月苗已齊今見科秧沒清泚往時高者猶可耕
今見陂陀入渺瀰蛙鳴在竈地湧魚天意冥冥猶未已
老農輟耒苦嗟歎饑饉流離自茲始嗚呼天心自仁愛
坐使沈陰肆姦宄何不令飛廉掃蕩羲馭馳敷天率土
皆歡喜視爾蒸黎誰忍此

王和仲秀才以事招至鄧尉山時梅花正開題清

聞閣

參橫月落雞亂鳴
輓輿載酒山中行
山溪有春藏不得
萬樹梅花竟成國
縞袂輕寒怯曉風
不知身在萬花中
緣溪積雪無行徑
時有暗香來不定

次韻寄紅蕉閣

春色仍孤賞
歸程記夢中
百重迷嶺樹
五兩辨江風
藥裏無人檢
音書有雁通
未成偕往計
吾意愧梁鴻

附原寄

香撥金猊冷春淡子夜中一襟楊柳月雙鬢杏花風
鴛繡此時倦魚箋幾日通嬌兒方睡穩緘意託飛鴻

重五日游幕中丞園時新陽韓大尹燕奉母寓此

表節從懸艾無心逐泛舟皆言吳市近不比習池遊園在

姑蘇間絲竹東山盡林泉別墅留當門欹老樹一徑入

門內清幽

路仄山爲障池平屋作船洞陰松謾謾檐隙竹娟娟
食餌魚爭上忘機鷗自眠相看真意愜養拙是何年

傍水頻移榻梧風入座清
黍香青箬裹酒冽碧筒盛
曲沼花初發芳籬果漸成
不須論巧宦私羨版輿迎

尙說平津第曾延東閣賓
屋烏誰識主堂燕更依人

爲園

前明申相國故宅後
歸中丞又屢易主矣

喬木輕煙合蒼苔過雨新
歸途意

蕭瑟虛羨穀皮巾

贈吳生載和

學成貴有用章句慚小儒
窮年守鉛槧白首空伊吾
詩書豈陳言乃供口耳娛
古人處蓬華誦說皆訐謨
方其

坐論時衆口嗤迂愚一朝作霖雨豐澤施寰區南陽草
廬中豈非伊呂徒三顧洩大計鼎足資匡扶食糜一何
苦憂樂志不渝慷慨陳十事偉略安邊隅斯人不可作
後當誰楷模吾生亦良貴胡爲等墟拘致用雖寡術利
物敢憚紆此意久耿耿不敢奮臂呼之子實佳士抗論
無異趨鸞鳳有奇翼騏驎騰高衢恥作不材雁詎比無
用樗枘哉葆初志慎勿墮半途

讀戰國策

平生學儒愛儒術不取縱橫短長說偶然尋誦輒拋棄
開卷那能待終畢前有中壘後南豐兩人行誼將毋同
文章爾雅意忠厚頗恠虛費鑽研功堯舜旣遠周孔沒
處士張頤紛鼓舌商於誑楚心不慙人欲橫流天理滅
連橫十說意何欲所希錦繡與金玉委瑱齷齪安足論
軫衍代厲皆其屬頗聞鬼谷乃彼師我取遺書一讀之
飛箝捭闔計深秘孤陽退匿羣陰馳始知大道旣淪缺
一化人心成險巇吁嗟六王亦太愚但愛重寶輕疆隅

趙璧周鼎果可出詎見冠帶偕來趨幼耽驕寵長昏闇
國事盡付權姦徒坐令羸氏日兼并遂制六合開雄圖
當時虐焰及墳籍古策淪亡最堪惜漢周中曠二百年
舊事無由徵竹帛此書尙足備考稽終勝斤權按點畫
小窗且復理叢殘白日無光照檐隙

有酒

有酒不斟酌其如良夜何牖疎窺月靜慢卷入風多切
切援琴語琅琅擊節歌醒狂猶自笑可待醉顏酡

武林趙徵君園看竹

中散園林半未荒琅玕猶自拂雲長
清陰盡日來書幌
新筍經秋出院牆
宿雨正添千个碧
匡牀須借一宵涼
亭邊六六閒鷗去
空憶吟魂對夕陽

園有三十
六鷗亭

七月十五夜南華堂對月

勝地經過熟茲游得未曾
小池涼月上高樹
薄煙凝委砌金波
湓流天玉鏡澄聯吟呼稚子
隨意石欄凭

曲磴蒼苔滑山樓夕不扃
波搖簾影白峰逗屋隅青露

下衣還潤風多酒易醒仰闕天闕近誰是使臣星

庭院陰方午軒窗四面涼秋聲滿梧竹清怨入蛩螳夜

靜魚戛永心閒茗椀香二林餘韻在惆悵倚吟牀

卽趙谷林

意林兩微君故居

自武林之姑蘇舟中作

落日扁舟柁晚何布帆無恙翦滄波江城雨重疎鐙暗

山寺鐘寒落葉多歸夢已遲秋後燕流年空擲客中梭

茲歲來往蘇杭已三度矣

西州尙有羊曇淚華屋當時記數過

時送王慤

園方伯葬
至武林

自題閉門覓句圖

老屋生塵榻未移縱橫書卷壓烏皮墨將磨子眞憐汝
詩不窮人卻怨誰遠夢漸隨芳草盡苦吟端有晚蛩知
豆花籬下藤陰底尙憶循廊負手時

西風

西風颯颯雨霏霏旅館蕭條夢亦稀稻熟野田飢鼠出
草枯江郭鷺禽飛愁多自覺詩腸濇情極翻憎酒力微

簾外候蟲吟不斷
暗催刀尺製寒衣

有懷從學諸子

河梁前日別孤夢
遠相尋問字杯
還把論文漏每
淡荻花欹岸舞
瓜葉覆檐吟歲
晚吾誰與煩紆
永夜心

送張三

世綸

歸武林

天氣殊未佳
君定成行否
秋意滿江城
淒涼一尊酒
菲菲籬下菊
攀折漸盈手
寄語故園人
芳時莫孤負

聞省試榜放有懷諸子

酒醒江樓夢亦闌雁書不到漏聲寒爲鷺始識三年誤
相馬輕邀一顧難長劒自鳴心耿耿短檠相對夜漫漫
故鄉秋意悲搖落湖上山光已倦看

雨泊胥江聞鄰舟歌感而有作

衫鬢雙青久自嗟三年奔走夏天涯蕭蕭正聽江南雨
緩緩誰歌陌上花老去秦娘偏感客病吟莊舄正思家
孤舟向晚歸何處水國滄茫一雁斜

胥江以子胥名心傷東門縣目之言因作長歌陳

吳亡之由於子胥亦不能無譏焉爾

吳通上國始屈巫楚敗柏舉由申胥兩皆復讎非爲國
坐令廟社成邱墟苧蘿山下賣薪女大道宮臺教歌舞
當時自爲沼吳來竟墮術中悲闇主皆言哲婦能傾城
豈知召侮在佳兵伐荆伐越事不已怨構四國來信爭
勞師北征等狂噬惻款忠言不能制借問先時誰基謀
遂使鳴張忘國計縣目東門衆所憐救時無術一身捐
蘇臺未見游麋鹿江水先看化墓田秋風搖落梧宮裏

狡兔猶存走狗死如荼如火空自強鳥喙終湔會稽恥

旅館

楓林霜晚雁來初旅館寒生臥病餘聞道故人歸去好
一竿秋水釣銀魚

冬日同吳生

載和

重游慕園卽示

歲月忽已晚客心慘不陽昔游正徂夏百卉攢芬芳山
榴發霞絢紅蕖扶新妝飢風自南來過雨生微涼挈我
二三子同上君子堂主賓忻盍簪談笑羅酒漿肴覈芬

薦盤瓜果雜佐觴蘭尊旣屢傾歡極各欲狂余時抱私
憂強復隨相羊誰知泛梗迹譬如驚鳥翔茲來歲云晏
朔颼鳴空房敗荷立枯莖落葉蒙寒塘昏鴉何紛喧風
景慙以荒回首望諸子各在天一方襟懷耿不開念舊
迴中腸彳亍經前埤相願意自傷膏車秣吾馬前路阻
且長我行旣孔亟汝留亦惴惶疾風飄隕穉安知稅駕
鄉何當久歡聚共此鐙燭光愛汝有奇翮努力自奮張
功成好歸來結廬還相望

癸丑正月六日將赴公車述懷

機舟夕未發送者皆在門游子何屏營涕泗方沾巾憶
昔已酉冬駕言謁

帝閭戚戚慈母懷欲語聲已吞謂汝當遠行何時理歸
轅汝兄昔應舉空見靈輻旋諸弟何怡怡今惟一弟存
汝今復言邁遠望傷我魂眼枯淚亦竭蕭蕭雪盈顛五
中暗崩摧安忍違晨昏有父在燕南白首猶依人書來
戒行期日夕晞車塵行役滯星霜衰老隔關津一身不

自由進退俱遭迍且踐公車署試訪京華春所謀卒無
成乃負鞠我恩湯藥不及視飯啗不及親罔極抱淡痛
蓼莪悲鮮民終當委溝壑已矣復何言顧惟鵠羽嗟尙
想陟岵勤飢走四十載欲歸苦無田有子旣及壯不能
具羔豚躬耕與服賈陳力愧前聞古人捧檄喜仕亦時
爲貧茲游豈得已匪慕軒冕尊去去謝親串哀思難具
陳

重過閭門舊館卽贈王氏諸弟

驛路梅花發江城夜雨懸烏衣延舊客綠酒悵離筵門
祚艱薪負縑緇係緒傳燕臺正收駿莫忘祖生鞭

京口守風題甘露寺

岿巖山寺枕江流屋角懸鈴語未休山鬼晝驅虎豹出
江斐夜挾黿鼉游廣陵樹見不可渡瓜步潮生空自愁
北望長安如日遠煙波何處著扁舟

清河懷古

通志縣東南五里卽淮陰故城

國士昔未遇風塵誰汝知萬家營葬日一飯受憐時干

說終無用追亡尙見疑何論亭長婦厭客夏晨炊

渡黃河

崑崙來九折駭浪拍天浮吐納兼淮泗奔渾控女牛誰
能陳上策空見誓中流

用宋史魏
仁溥事

濟此洋洋者言愁我

欲愁

途中見飲牛者漫成

滿目征塵暗臨流此獨閒且依牛口下安事馬蹄間落
日橫殘店疎林隔遠山薄游吾未已行路正多艱

山左道中

滕陽小雨報春耕
鄒嶧殘山馬首迎
北望海雲含日氣
東來汶水雜冰聲
功名不數齊三士
節槩終歸魯兩生
舊事難從遺老問
路長心急畏郵程

東阿懷曹植

謁帝初回憩洛濱
淡情一賦託神人
九歌不少靈均怨
莫信當時爲感甄

景州訪董子祠未及至

漢武眞雄材能御蹕弛士董生王佐略天人究終始柰
何相兩國其用乃止此異哉平津侯客館爲誰起有賢
不見容所喜阿世耳驅車入廣川寂寞經舊里褰帷悵
無由夙昔徒仰止

秋日有懷

臥病方思橘秋風更憶萸篋中前日字衣上舊時塵落
葉如愁積殘鐙與夢親遙知吟閣夜應惜未歸人

贈嵇二

岳源

同年

三年虛蹋軟紅塵窮巷篝鐙冷夏親破帽秋風同病客
空堂夜雨未歸人俱愁白髮門間遠相對緇衣歲月新
乞米傭書緣底事藥鑪經卷鎮隨身

燕姬

燕姬二十顏如玉雲髻山眉巧妝束妝成苦自愛娉婷
盡日當窗理絲竹綠楊大道春風多春風偏入黃金屋
畫手誰能託容貌琴心且復輸衷曲長安貴人勢炙手
一顧餘輝發枯木悅已那論自媒賤百年過眼如風燭

祇知恩遇久相保誰識歡悰後難續洞房綺閣開層淡
珠簾繡幕紛交屬新人矜寵舊人棄置膝墜淵情反覆
朱門一入不自由此身已失甯平聲能贖夜半笙歌響過
雲獨背寒鐙淚盈斛

對雪行

閉門且學袁安臥門外雪花如掌大稀聞乾雀噪衡檐
微見寒煙生土鏗緣藁冒砌已填委拂石縈林尙飄簌
晶瑩天地忽同色一塵肯受元規浣山中故人有書至

汲井灌畦日親課階松手種今十圍牆竹陰添餘萬箇
山溪有懷時獨往客閒乘興猶相過不知歲晚復何似
雪後梅梢萼應破沿溪路熟酒可賒落月清寒香入座
繫余落魄滯公車衣敝履穿嗟坎坷雄心久應消驥櫪
虛名那得辭馬磨艱難索米苦自留無事干人盍疎惰
獨憶江南驛使來新詩寄我猶能和

甲寅三月

聖駕巡幸津淀獻賦恭紀

蘇橋柳色上蜺旌

御舸纔移父老迎
八簾和風消海氣
萬家膏雨入春耕
花因近

輦方爭發鶴解褰
羅夏不驚待詔揚
雄猶有賦秣愁閔
達愧承明

偕友人劉大

嗣綰

同年吳大

文照

戴大

聰

赴天津

寄居問津書院同年呂二

兆麒

時主講席招食

江珧柱卽席賦

我家具區濱川禽日登饌海珍數江珧結想苦未見風
味衆所誇食譜名久擅如何玉柱君得亞紅雲宴二年
北入燕索米尤困倦誰從掛席拾空有朶頤羨歛來津
門遊良友聯几硯值此講舍閒留客娛清燕紺體初脫
泉饒喙已私嚙甘脆出鼎烹芳馨動盤薦匕箸紛綸加
有如雪消硯童僕顧我笑旣飽有餘戀始知至美存匪
以虛聲銜物生鮮實用浮譽安足眷說士同所甘畫餅
同所賤合座恣歡謔狂言愜羣彥莫遣下士聞顏色恐

愧變

游法源寺

長安旅舍春晝閒
鐘聲隱隱來禪關
試穿窮巷入寺去
寺門半掩如深山
風旛自縈香篆細
石徑已埽苔衣斑
於中小閣勢巖嶮
下有白骨埋蒿菅
邊庭喋血意未已
幾見戰士能生還
寺僧言下有瘞骨時聞鬼嘯
拂衣踐石更追賞
繁花覆地不敢攀
海棠端麗如好女
嫣然一笑開芳顏
花前直須攜酒坐
寂寞反怪僧廚慳
高林無風白日寒
烏

巢落子啼檐端周巡軒廡忽惆悵令我有淚還潸潸憶
昔炎宋鼎社移孤臣痛哭隨播遷竄身卜肆棄妻子豈
願姓氏留人間不知時宰復何意強搜巖穴貽嘲訕棲
棲大節不可奪一死氣足摧羣姦千秋魂魄尙棲此欲
薦勺水無因緣曹娥片石亦淪失壁間斷碣空爛爛
漏卻復出安史百世何以興愚頑

薇省晚直

掖垣槐葉響蕭騷兀坐輕寒逼毳袍霜漏自聽

仙禁永月華徐轉

鳳城高已知

聖主求衣急更想羣公補袞勞異夢不須徵綵筆夜淡
綸綍在揮毫

忻州汪刺史重脩元遺山墓並置產恤其後人詩
以紀之

風雅經南渡中原誰可論干戈遺老盡著述左司存野
史荒亭古詩人斷碣昏五花張幕地應爲吊吟魂

甄墓追前軌今逢刺史賢樵人知避壘野老識題阡耕
讀求遺裔春秋仰薄田他時懷作者循績共流連

從 御園步至昆明湖

昆明湖接

御園西石逕斜通望轉迷夾道泉流

宮籞近過橋山護

禁垣低水田未沒禾根短沙渚新遮荇葉齊散步不知
歸去晚更隨殘照過前隄

擬從軍行

我從荷戟隨征蠻百戰沙場猶不還我昔南行方毒暑
貼貼飛鳶墮如雨我今夏逐塞雲飛我夢空隨朔雁歸
白骨荒原秋草盡當年征戰幾人回寒風蕭條白日速
野狐跳梁山鬼哭前軍烽火終夜驚夏蹢堅冰走巖谷

書無錫華鴻山學士六十言懷詩卷後

學士高名震斗躔文章海外尙爭傳

見明史本傳

徒聞姓氏

誇邨嫗詎獨才華照史編垂老未忘風木恨誦詩難竟

蓼莪篇

文田失恃十年誦公詩盡然感痛

公家舊德能長繼遺墨搜儲

見後賢

公本南齊華孝子後

題王通守

澧

南浦歸帆圖

片帆安穩別匡廬
春草春波畫不如
載得清風歸去好
恐煩慈母訝監魚

送馮掌科

培

前輩養疴旋里

一紙驚聞已乞身
依依直爲夙心親
文章可但驚時輩
風義兼能到古人
故國生涯問松菊
早秋心事動鱸蓴

情知掛席江湖去清夢猶應繞

禁闌

簪毫同傍日華邊班馬愁聽祖帳前去國尙非遲暮齒
看山應有宿生緣車書四海爲家日鉦鼓三軍敵愾年
草檄正須磨盾手可能無意久林泉

送費員外

錫章

之關中

岷川烽火接三秦螳集蜂屯歲月頻

聖主籌邊移李愬重臣開府乞王珣詞成露布收銅馬

凱奏飛書入

玉宸少小論交心跡在肯隨驚蹇踏轅塵

近事

四海欣瞻

天日姿重光又際

聖明時小侯金穴誰爭羨右相冰山已可知軍國有才
需幹濟廟堂虛席待論思拾遺補闕皆臣職莫遣憂危
仗獨持

庚申春夏之交京師亢旱多風有

旨省刑獄旣而大雨

萍號不起夜常風

丹絳俄聞出

紫宮絕域

賜璫游憊重園扉解紲辨孤忠庶徵調燮皆人事萬象

昭蘇識

帝功正是王師下秦蜀鶚音應集泮林中

夏鄉遇雨時奉

命典試粵東

皇華照原隰靈雨隨車輪不惜行路艱且爲萬物欣濃
柳蔭通衢碧水滋前津平疇生曉煙騁望綠已勻耕笠
聚南陌荷鋤方及晨秋風茅屋下定有咏歌人

自雄縣至趙北口

曉發燕南路蒼茫白水橫魚莊臨岸仄沙渚接隄平遠
鳥煙中見孤帆草際行故鄉風景似歸計悵前程

自京至粵

可道浙中以格
於例不得歸省

經舊縣

出門喜見山卻向山中去曲徑屢回盤已到雲生處禾
黍徧高原梨棗低前邨清泉挾新雨石齒鳴潺湲居人
傍殘郭但解事耕作荷鋤衝曉煙叱犢淩深壑輜車正
遠邁中道茲淹留林谷有微尚願作平生游

薄暮抵滕縣謁滕文公祠

馬隨殘雨去迤邐入滕陽樹缺橫煙郭沙平臥石梁居

人供稻黍驛路下牛羊古廟還瞻謁遺模問井疆

桃山驛謁岳忠武祠

鄂王祠宇山驛前穹碑屹立蒼苔纏入門鐫刻滿四壁
中有遺迹騰雲煙詩成北伐意忼慨誓雪國恥詞勤拳
桃山有祠誰所剏拂拭碑字求因緣當年勲績敗和議
後人零落隨播遷或居臨安或構李散處楚蔡如星躔
監倉學士振門緒遺胄再徙來淮堧裔孫鍾靈此締構
近在明代神宗年已尋圖碣得源派卻向里老諮流傳

環居不下數十戶祗解力作安耕廬吾鄉祠墓歸然在
子姓落落譜牒湮但多耕鑿守淳樸安用簪笏誇蟬嫣
里名今尙稱孝義嗟哉後嗣何其賢

往歲河決睢寧水自宿州過靈璧注洪澤湖余行
役過此彌望汪洋田廬皆爲巨浸感嘆有作

昨朝驅馬經彭城河水不流沙渚橫今農卻向符離道
天半銀河訝傾倒符離城外高下田誰知盡作龍蛇淵
乘風挂席去浩蕩四顧廬舍稀人煙東流奔騰繞靈璧

濁河直占清淮宅百里芳塍已產魚幾家茅屋方浮鷁
我聞疏導稱禹功渤澥上與龍門通後人防禦出下策
與堙洪水將無同刷沙舊制意良得捐棄曾聞前相國
祇今河底上出城人事將窮恃神力
聖主勤民詎惜貲水衡安得數千億

宿州

連舟鐵索臥晴波鐙火行人此渡河青到符離山色斷
黃過靈璧水聲多誰家曉露收瓜菽幾處野風開芰荷

景物漸知秋意近
鞭絲鬢影柰愁何

渡淮題驛舍壁

森森清淮水接天
濯波楊柳萬條煙
孤帆影落漁燈上
新月還來照客眠

臨水窗開暑氣微
數聲柔櫓夜船歸
澄波帶月明於晝
時有閒鷗片片飛

立秋前一日次護城驛作

山驛起層陰
微雨灑百草
涼風先秋來
爽氣入襟抱我

行方憚暑酷烈去如埽秦蜀久苦兵民生何擾擾熊羆
嘯山野豺虎亂邨堡王師已屢下兇猾稽誅討游魚悲
鼎沸林木畏原燎安得同清涼立使起枯槁生逢
堯舜君反側宜遵道

過廢梁縣

是日立秋

殘夜過梁縣雞聲續續催亂雲遮馬度涼雨伴秋來早
稻翻畦熟晚荷臨岸開無因一借問空憶鮑昭臺

薄暮渡桃溪時淫雨暴漲橋渡盡沒

桃花城外水云是古桃溪秋水幾時至仙源更易迷岸
絲垂柳重田葉覆蘋齊欲渡風波惡滄茫落日低

宿小池驛

王事未云迫薄游尙多暇倦馬臨崇阿秋原白日下嶺
色落虛窗泉聲入涼夜雖無館吏迎且息僕夫駕

題黃梅徐明府

鏐慶

兩歧粟圖

詩人新出宰化理在琴聲入境瞻三異披圖詫一莖歸
禾前史紀華黍舊題賡不遣漁陽吏風流獨擅名

清江鎮守風至楊二尹 正邦 署中晚飯

暮煙不見大江橫
盡日顛風斷客行
鹿脯未謀倉卒至
萍齋可待咄嗟成
干戈漂泊心猶壯
歲月奔馳夢亦驚
束髮交游幾人在
一尊清話慰離情

楊三 正邦 以州同知入楚需次十二年馳驅戎馬

艱苦備歷
今秋始借補黃梅丞
余于役過清江
鎮乃履任之
次日喜得相見
又嘆其遭際之難
渡江次日卻復簡寄

楊侯別來十二年中間消息猶茫然艱難數載事戎馬
雁書不到軍門前乍來江口瞥相見喜極翻令淚如霰
自言九死歷戰場到此歡逢豈初願功多已邀

天子知廷議不得逾常資官微且僂竊升斗身安敢論
居喧卑楊侯楊侯爾暫息鵬鶚得天終奮翼我昨乘舟
渡早潮盡日風波行不得三夏潮落浪已平歛如快馬
張帆行琵琶亭外津吏語鐙火早見潯陽城人生遇合
皆時適過眼浮雲變今昔所嗟良友會面難歸當與子

話終夕

峽江夜渡

峽江出兩山中盡日緣江路忽窮臨水孤城微見月
過橋淡樹暗鳴風沙連晚艇漁人渚岸對疎鐙估客逢
我亦便隨宵渡去看山還徧贛江東

泰和縣見表姪鄒宇春

七暑京華客榻連臨歧情色兩淒然直愁後會難期日
誰信相逢不隔年去驛雲遮穿嶺馬歸程風送下灘船

東野先生集 卷之六
三
哦松好便緣江住木葉飛時話重聯

贛縣阻雨

我行月再周漸見嶺頭樹江水夜來淡復向雨中住雲
氣壓孤城灘聲吼前渡何處是崆峒山色入煙暮
枕上聽殘滴愁絕不成夢秋意蟲亂鳴涼聲竹初弄寂
寞鐙焰微迢遞柝音送木客倘能來起與傾春甕

發贛縣作是日白露節時因寧都大水贛州水及

女牆滯留五日

空庭見秋草殘夜明初露五日滯虔州流光暗已度雲
開翠玉樓水落黃金渡去去軫客懷災黎尙盈路

度梅嶺

炎方天意設重關

文教偏能被百蠻一綫石門凌鳥上雙排旌騎出雲閒
泉聲靜落巖邊寺霞氣遙連海外山聞道梅花時節早
尋春正及使車還

曲江夜泊

一灣江水照人清
夾岸山光繞艇橫
夜靜不知流水急
錯疑秋雨瀉檐聲

曲江道中

曲江山勢天下奇
昔人南征曾記之
我疑鑿削出工巧
峻絕又非人能爲
造化鍾靈有淡意
不肯雷同轉瑰異
方堂圓廩側挂帆
突兀千形各殊致
平生夢想巫峽雲
足跡未到天西垠
猿聲兩岸宵空憶
楓葉滿江秋不聞
廬阜龍嵒傍南斗
自入潯陽便翹首
裹行卻復出虎溪

瀑布香鑪兩孤負眼前愕眙胸屢開一壑一邱何有哉
直須攬取入文史苦乏龍門佚宕才

題觀音巖用湯舍人

謙

度梅嶺詩韻

巖穴亦未奇茲山實稱壯頗疑鴻濛初破空出新樣岬
岬勢已尊鏟削語難狀曲江殘雨歇侵曉客舟放蒼壁
劃然開靈境神仙長高懸百仞闕橫列千尋障騁望意
早驚臨際廣無量俯瞰清渚淡仰切青冥上滑平如受
砥卓立不成嶂龍門與蜀嶺吾亦聞諸向開鑿出人工

此巧殆難抗臨風吾意愜杖策倍神王攀援登佛閣憑
檻試周望法座自成蓮石雷儼垂帳豁豁古洞深結構
空巖傍新詩山欲乞嘉過天所餉囊空旣鮮貯筆退久
宜葬苦復費唔呿或恐負奇曠推尋造化理技摘鬼神
藏琢句語誰工懷舊意彌愴廣寒十萬戶脩月聚天匠
何年借玉斧揮手現殊相又疑芙蓉城半壁落炎瘴東
海泛仙靈百幅蒲帆颺刻畫殊未精穿鑿轉多妨殘鐙
分佛光佳茗拜僧貺去去理蘭橈差差鼓萍浪迴立煙

濛濛回首更惆悵

晚泊峽山寺登帶玉堂觀飛泉尋達摩談經處瞰
釣臺而返東西兩峰勝處未得盡厯作此付佳
持以期後至

江行初見寺傳是古飛來到嶺碧雲合臨流紺宇開水
澄涵巘嶠山翠鎖崔嵬岸迴攀能上僧閒出暫陪空庭
驚鳥雀滑磴踐莓苔舊榜題還徧殘碑字半摧虛堂窺
石厂曲檻俯巖隈烟暝看檣逝風低認鵲回榕陰侵戶

滿蕉葉傷階栽仄徑艱方
厯扶欄斷欲頽行邊飛急雨
腳底走春雷誰蹋蒼崖裂
眞成白雪堆危梁欣架搆異
樹間栽培勝賞幽襟豁斜陽去帆催徒尋經座石卻向
釣人臺遠路迷松柏叢祠未草萊禹陽前史溯福地昔
人推澗響千峰夕猿啼萬壑哀亭軒空想像林谷漫沿
洞有約留殘菊歸期及早梅逢時莫孤負杖策待徘徊
已分山靈識甯平聲愁野鷁猜羹香蔬薦席泉汲茗浮杯

翰墨猶能繼祇慙大雅才

寺僧乞留詩以繼諸前輩故云

出中宿峽至清遠縣

江行五日夜日日山中行山勢忽已斷江流始漸平人
家沙岸闊燈火釣船明清遠知何似悠悠懷土情

十月五日歸道曲江章太守

銓

余明府

元燾

招登

九成臺夜讌還舟作此簡寄

山城高枕曲江邊城上孤臺尙巋然嶺色沈沈寒欲雨
瀧流泯泯夜生煙千秋悵望懷遷客勝地登臨惜別筵
韶樂不亡神自在試聽解阜入歌絃

臺銘爲東坡
先生手題

九江曉渡

潯陽郭外雨冥冥千載琵琶送客亭
雁自南來人北渡滿江楓葉不堪聽

蕭山汪氏雙節詩

疾風摧喬林天地歟崩裂巢傾卵豈完
顛沛安可說賢哉兩節母荼蓼苦茹齧
上有七旬姑皤皤髮如雪有子不得依
遑問甘旨缺弱雛裁十齡孱疾增憂結
況乃外侮加門祚何黜艱協力支墜緒
千辛係遺孽送往禮不

魯存孤事尤烈陰暄豁然開天意憐奇節畫荻名早成
酌泉志逾潔文章與政事奕奕追前哲有孫亦克肖努
力守成轍雲路旣孤騫驥足方奔掣徽音播煒管慶澤
流縣飈之江絕清駛萬古照綽楔

題汪庶子

學金

前輩靜厓圖

已撥彤骸累翛然萬慮清澗松空自響山鳥不聞聲茆
屋鑪煙細蒲團佛火明妙參知止諦定合勝無生

送趙舍人

懷玉

前輩出爲青州司馬二首

壯歲忝竊官幸入清華省趨朝日始晨襪被漏方永追
隨得名流風雅夙所秉齊梁意方駕韓杜力馳騁文壇
樹堅幟古籍理修綬休暇屢過從談笑輒移景形迹久
漸忘雄辨有時逞長安未易居囊粟苦支領文史誇東
方安得侏儒請廿年改一官驅馬入齊境頗知閒曹閒
謂勝冷官冷繁余夙昔親聞此意耿耿宦迹隨風塵孰
測萍與梗何當繼前游良夜燭重炳

江左推高門循良有遺澤仕也非爲貧努力守清白仁

風扇海隅膏雨被春陌以此方寸心起彼溝中瘠青州
實雄郡夏書記廣斥地利饒魚鹽土沃宜稻麥所憂民
俗悍是乃司牧責經術可設施艱難杖規畫勿言枳棘
棲民物待滋液吾祖昔作宰亦此領繁劇尸祝在里閭
惠政流貞石及茲已百年人民幾更易煩公搜志乘爲
我訪遺跡

度仙霞嶺

磴道回盤出曉煙始知身在衆峰巔危梁架構心常怯

幽徑穿尋意亦便
瓦屋幾家藏密篠
梯田千派落飛泉
相逢行客無他事
高價惟看紙壓肩

身世都無一日閒
郵程且復縱躋攀
炎方秋暖花爭發
絕壑陰涼鳥自還
晚稻插畦諏土俗
清泉烹茗叩禪關
直從茶嶺穿梨嶺
萬點蒼螺夕照閒

雨後至馬嵐見李太史

鼎元

前輩題壁

山行盡日略緣溪
山館遄來日已西
舴艋喜聞煙際語
鉤輅解愛竹山啼
到門雨送灘聲急
入牖雲遮嶺色低

持節何人推好事中山使者徧留題

時太史出使琉球

萬安橋謁蔡忠惠祠

飛梁跨海資神力八日曾聞斷潮汐不然萬古蛟龍淵
浩蕩何由能壘石晴虹宛宛控迴瀾目極不見江南端

萬安渡本名洛陽江

靡金賦事有公記高文大字穹碑刊我來九

月風正厲巨浪如山那可制行舟欲渡愁殺人始信公
功在萬世焚香酌醴拜公祠往哲風流夙所師封章前
後見遺直賓館流傳誦近詩書名尙爲世膾炙德澤況

入人肝脾文章政事兩足述仰瞻廟貌增懷思不知松
種七百里未化可有蒼蚪枝

自閩入粵道經泉州漳潮惠諸郡感事述懷

衆山磊砢而嵯峨其水激蕩而揚波地靈藏育有奇氣
造物不肯援常科篤生賢喆紛接踵下乃一化爲偏頗
我由泉州向漳浦大儒舊里頻經過當時閩學稱極盛
豈祇冠帶誇鳴珂前李後蔡亦傑出遺意向欲追鹿
洞鵝湖未知風會變何日鄉里往往尋干戈有如岐封周

舊京脩矛借作秦人歌孫盧繹騷爲衆患波濤出沒隨
蛟鼉黃岡迤邐入南粵肩輿盡日臨崇阿譁然赴訴攔
道哭體攢瘡痂田無禾前者未歸後者繼令我蒿目呼
奈何吾聞朱子在漳州教澤婦女猶漸摩退之守潮纔
七月甘棠遺愛何其多文能驅鱷竟西徙至誠感格言
豈訛安得乘風告天帝早遣壯士傾銀河一洗氛祲布
淳化欣欣八極同祥和

人事行

退之貶潮陽子瞻遷惠州當時謂非人所居孤臣竄逐
心懷憂天荒地冷有時闢爾來雄富傾南陬惠雖不如
潮冠帶亦雲稠始知帝王重聲教漸被力足窮遐幽吾
讀瀧吏吟中憤意難默坡老殊倔强時亦露悲惻萬死
投荒更何得祇今尸祝惟兩公人事迷茫安可測

望羅浮山

陰那矯首臥屏張四百餘峰靈境藏紫霞碧雞不可見
瑤房璇室空相望飛泉流出向何處梅花正開應斷腸

人言有約終不到落日欲沒心茫茫

諺云有約不到羅浮

粵東試院六詠

闢圃

宦跡天南暫寄居未忘風味是園蔬清齋早定三年計

隙地新開二畝餘曉甕汲泉隨分灌崩榛當路稱心鋤

經春生意蓬蓬長茂叔窗前草不如

使廨爲周子提刑粵東時故居

疏池

池上風光好自娛心憎皎鏡半塵污移橋特遣開生面

鑿地休令占一隅

東南展拓數弓

舊滓澄清無障礙靈源疏瀹

費工夫波涵竹樹娟娟影吹袂輕颺似舞雩

種石

有巨石久淪汗淖仍令扶植池中

佳石偏宜倚檻看多年蹤跡歎泥蟠崢嶸漫道出頭易

安穩仍愁立腳難落落星芒高北斗

藥洲舊有九曜石南漢時物不知何

時移一入藩署今以此補其缺

棱棱風力障狂瀾

池水從粵秀山來此每雨後奔流甚駛

君誰是盟心侶種得梅花共歲寒

移桐

舊近廚舍移植池東

託根只合近芳池
小院梧桐帶露移
多恐良材歸爨竈
肯遺嘉植誚場師
脫身糞火柴烟外
結伴疎花秀石宜
待得一番新雨足
森森早見鳳皇枝

補花

水石相於竹木森
無花孤負好園林
評量位置爭春易
點檢根株占地深
來歲芳菲應滿眼
他時池院自成陰
思人愛樹吾何敢
培養猶能見此心

護樹

園中有
連理樹

嘉樹森森已十圍雙垂密蔭近軒墀駢柯接葉高還並
異本同心久不移抱質幸無斤斧伐儲材應作棟梁資
可知不是無情物辛苦栽培敢自遲

峽山寺觀瀑次翁覃溪先生用東坡廬山二詩韻
秋雷轉陰壑石逕生寒風攝衣踐蒼苔碎厓起白龍又
如銀河瀉百丈翻晴空奔流不知往一碧涵演漾我行
嗟永久江路迷西東觸熱事遠征避暑來梵宮高軒俯
澄泚遺跡懷坡公豁然心目開何必匡廬中

溯源始涓涓，巖嶙各分溜。及其衆派并，厓石相撐鬥。力
洗塵界空，秀出諸峰右。誰從太古初，疏淪出靈竇。溪寺
鎖寒猿，古木亂飛狖。我欲凌高巔，爲怯短筇瘦。迴身憩
石梁，琴筑尙鏗奏。岩岩屋建瓴，洵洵弩離殼。涼意侵紵
衣，急雨送晴晝。欲別勞山僧，滿甕助甘漱。

題高州杜太守

安詩

晚涼洗馬圖

杜前曾
官充郡

落日南池上，招邀記勝游。晚荷臨淺渚，疎柳入清秋。坐
石渾忘倦，披衣爲稍留。丹青寄眞賞，萬古此驂騑。

化州楊刺史

元藻

見惠橘紅並示辨橘紅歌言產

於州解西園者世稱老樹氣味芬甘服之能益
人雖州人亦不易得然實皆柚也余親驗之信
然作此答謝

芳聲誰遣橘奴當藥鼎偏同李代僵微願但於人有濟
虛名可與世相忘炎洲自散千林赤舊圃猶垂一樹黃
珍重封逾三百顆不須重問洞庭霜

次清陰口占

覆地松陰綠四圍喧闐車馬到柴扉野人看客不知返
社燕尋巢何處歸時館人斫松構架以代帷幕甚得野趣矮竈細烟通隔
舍破檐斜日上征衣門前十里雷州路暫雨新添稻葉
肥

癸亥閏二月廿四日夜半由徐聞渡海至瓊州

數年蹤跡來南溟地角天涯無不經蓬萊方丈渺何許
挂席直指仙人庭人言海水勢震蕩白日無風走濤浪
天樞地軸助迴幹日馭雷車互還往我聞始怖意轉濃

眼界一洗江河空平生忠信那可杖或恐駭浪翻蚪龍
天空無雲駟星直

海中仰視正當房宿之下

殘月四更如半璧輕舟

試踏鼇背行陽侯深潛颶母息澄波下瞰鮫人宮南極
平懸龍伯國世人舉事爭險夷安耶危耶誰獲知千金
共守垂堂誠萬里安能破浪馳此行合作紀游冠珊瑚
珠林搜濫汗東坡昔日歎奇絕況我南來非謫宦馬鞍
山色入滄茫卻望雷州如故鄉海外一聲雞唱曉早見
紅日升扶桑

諸書言日出狀各不同余於海中親見之初纔一
綫未數語卽已升騰了無他異始悟昔人所見
皆水爲之余渡海時微波不興故分明如此因
誌之以告後人

鯤壑風恬掛席行夜闌凝望轉澄清纔看一綫朱霞吐
瞥見半輪紅日生星斗橫斜徐不辨魚龍偃息各無驚
著書貽後翻成悞輸與兒童辨論明

校試海南忽墮巨齒感而有作

迂夫病齒五經秋搖落偏來海外州
麤糲一生吾有媿
謗讒無故彼何尤
孔珪餘論甯平聲曾惜韓愈中年竟不
留惆悵朱顏容易改此生空抱百年憂

粵事四首

炎洲天遠海生塵軍火聲中巨艦陳
漢帝有書責楊僕
晉人無術死盧循去來邨保多於蝟
出沒魚龍變若神
橫海伏波今豈有空懷歐血一酸辛
賊所畏惟黃總兵彪以憤恚歐血卒
紛紛蠻觸苦相爭微隙端由睚眦生
長吏空懸三尺法

大讎終合兩家兵，不辭湯火軀猶借。但有金錢死亦輕，
安得絃歌化強俗。共安耕鑿樂昇平。

赴愬深愁聽易蒙，自慙化導百無功。爭心絕少知非子，
辨口眞成亡是公。蜃氣易生瀛海上，鴉音偏在泮林中。
直須反縱秦人焰，衡石程書一炬空。

土沃民淫理固然，易心奚止酌貪泉。梯航有路通夷島，
鏐綺如雲壓市廛。華服靚妝春樂國，短簫橫笛夜歸船。
詩家錯會風人旨，開卷先賡贈芍篇。

題吳退莽暄同年行照

嶺外青衫客圖中白髮生三年空有刺十說竟誰行放
眼乾坤窄澆胸礪磊平不如張翰達身後未忘名

歸善令傅碧萊

屬題泛海圖

河南登封人

萬斛舟疑一葉輕快帆如馬踏潮行來從九曲洪流壯
看到三山濁浪平屏息魚龍皆偃伏忘機鷗鳥自將迎
炎洲瘴霧今消盡回首扶桑日正生

時惠州會
匪初定

題任通守廬墓圖

駒隙誰能駐傷心是宦游征人懷稷黍列樹撫松楸飲
水懷先烈歌棠被遠陬早知忠盡意不負

帝廷求

出中宿峽

王事久行役客心如轉蓬嶺雲變寒暑江路忽西東
淡樹濃經雨輕帆飽受風僧寮空翠裏回首惜匆匆

宿黃茅峽

灘聲號石齒風色到船脣估艇歸前浦炊煙起隔津晚

禽啼勸客

兩山皆行不
得哥哥聲

飢虎出窺人觸暑吾方倦翛然

枕簟親

歸度庾嶺時梅花盛開在花中行竟日

五年三踏梅關路再見梅梢花正吐往時歸及小春天
點綴山容慰遲暮疎疎隨意破微萼馥馥有時開半樹
茲來春事已全動玉蕊瓊葩不知數到嶺初疑寒有雪
入林頓覺香成霧低枝清好信手攀老幹橫斜遮馬度
挽輿盡日意忘倦那得淹留傍花住南客匆匆又北還

心驚已過百重山夢回旅館月初曉尙有一樹臨溪灣